



LEMBAGA PELABUHAN KELANG

Beg Berkunci 202, Jalan Pelabuhan Utara, 42005 Pelabuhan Klang
Tel: 03-3168 8211 Faks: 03-3168 8228

KENYATAAN MEDIA

18 MEI 2022

PELABUHAN MALAYSIA RAIH ANUGERAH BERPRESTIJ DI PERSIDANGAN PELABUHAN DUNIA

International Association of Ports & Harbours (IAPH) mengumumkan pemenang *IAPH 2022 Sustainability Awards* semasa majlis makan malam *IAPH World Ports Conference*, yang telah berlangsung di Pusat Konvensyen Vancouver Centre, Kanada, Selasa lalu.

Northport (Malaysia) Bhd, salah satu daripada dua terminal di Pelabuhan Klang, diumumkan sebagai pemenang di bawah kategori Anugerah Kesihatan, Keselamatan dan Sekuriti. Ini merupakan anugerah pertama bagi pelabuhan Malaysia sejak *World Ports Sustainability Program* diperkenalkan pada 2018, di bawah naungan Capt. Subramaniam, Pengurus Besar, Lembaga Pelabuhan Kelang sebagai Presiden IAPH.

Capt. Subra yang dikenali di dalam komuniti maritim mengulas, “Saya berbangga salah satu daripada terminal di Pelabuhan Klang menerima pengiktirafan ini di Vancouver. Usaha Northport dalam bidang kesihatan, keselamatan dan sekuriti telah pun menerima beberapa anugerah industri, tetapi kemenangan yang diraih di pentas dunia ini adalah sesuatu yang istimewa”. Anugerah tersebut diterima oleh Ketua Pegawai Eksekutif Northport (Malaysia) Bhd, Dato’ Azman Shah Mohd Yusof.

Northport (Malaysia) Bhd merancang pelan hala tuju strategik untuk mengendalikan aktiviti perniagaannya ke tahap tertinggi di dalam piawaian Kesihatan, Keselamatan dan Alam Sekitar (HSE) ke arah mencapai kecemerlangan HSE. Ia bermula dengan fasa 'Transformasi' pada 2012 untuk menggalakkan perubahan minda dan tingkah laku. Pada 2016, tumpuan telah dialihkan kepada 'Pelaksanaan Berkesan' untuk menguatkuasakan semua tindakan ke arah mencapai matlamat HSE. Pada 2019, Northport memulakan 'Kelestarian dan Penambahbaikan Berterusan' untuk mengukuhkan amalan HSE terbaik dalam kalangan pemegang taruh. Akhir sekali, fasa 'Ketahanan dan Kesyinambungan Perniagaan' telah dikuatkuasakan pada 2020 untuk memeterai komitmen mereka terhadap pengurusan kesyinambungan perniagaan.

Anugerah ini telah diadili oleh juri pakar bebas serta juri awam yang menyumbang 30% daripada jumlah markah.

Pengarah Urusan IAPH, Patrick Verhoeven mengulas: “Kami gembira melihat pemenang dipilih antara 26 projek daripada negara berbeza benua seperti Amerika, Eropah, Asia dan Oceania oleh juri dan pengundi. Tahniah diucapkan kepada Northport Malaysia dan pasukan mereka.”

The Sustainability Awards telah diadakan sempena *IAPH's World Port Conference* di Vancouver, Kanada dengan kehadiran lebih 400 delegasi dalam acara 3 hari itu. Bertemakan 'Close the Gaps', persidangan itu menyaksikan pakar industri berkumpul untuk membincangkan cabaran dan kejayaan teknologi dalam sektor pelabuhan dengan penekanan terhadap kemampanan melalui amalan baik berdasarkan tenaga, pendigitalan dan daya tahan yang cekap dan bersih.

CAPT. K. SUBRAMANIAM

Pengurus Besar

Lembaga Pelabuhan Kelang

----- TAMAT -----



Para pemenang #IAPH2022 Sustainability Awards yang diumumkan di Vancouver, Kanada. Northport (Malaysia) Bhd , operator terminal di Pelabuhan Klang, memenangi Anugerah di bawah kategori *Health Safety and Security*



Northport, pemenang anugerah berprestij IAPH2022 Sustainability Awards



Capt. K. Subramaniam, Pengurus Besar, Lembaga Pelabuhan Klang / Presiden IAPH